

# SATU LANGKAH KECIL, SATU LONJAKAN BESAR

## ALANG-ALANG MENYELUK PEKASAM, BIAR SAMPAI KE PANGKAL LENGAN

“ **THAT’S ONE SMALL STEP FOR A MAN,  
ONE GIANT LEAP FOR MANKIND**

*Neil Alden Armstrong,  
manusia pertama menjejak kaki ke Bulan*

Pada tahun 1961, Amerika Syarikat mengumumkan rancangannya untuk menghantar manusia ke Bulan selepas Kesatuan Soviet berjaya menghantar manusia pertama ke angkasa. Rancangan itu didorong oleh fakta bahawa jika Amerika Syarikat boleh menjejakkan kaki ke Bulan terlebih dahulu, ia akan menunjukkan bahawa Amerika Syarikat adalah peneraju dalam bidang sains dan teknologi.

Tetapi mengapa ke Bulan? Dalam ucapan terkenalnya yang menyokong program angkasa lepas, Presiden John F. Kennedy membuat kenyataan berikut, “*Kami memilih untuk pergi ke Bulan dalam dekad ini dan juga melakukan perkara lain, bukan kerana ia mudah, tetapi kerana ianya sukar, kerana matlamat tersebut akan mendorong dan mengiktiraf usaha dan kemahiran kita sebagai yang terbaik, kerana cabaran itu adalah satu yang kita sanggup terima, sesuatu yang kita tidak mahu tangguhkan, dan sesuatu yang kita berhasrat untuk menang...*”. Cabaran hebat oleh Presiden Kennedy kepada rakyat Amerika hanya tercapai lapan tahun kemudian apabila angkasawan Apollo 11, Neil Armstrong dan Buzz Aldrin menjadi manusia pertama yang berjalan di muka Bulan pada 20 Julai 1969.

Apabila PIDM mengambil langkah pertama dalam perjalanan perancangan resolusi kami pada tahun 2016, ia mungkin bukan sesuatu yang luar biasa seperti perjalanan ke Bulan pada tahun 1960-an. Walau bagaimanapun, sama seperti Kennedy, kami tahu ia akan menjadi satu tugas yang rumit dan mencabar yang memerlukan tahap komitmen dan iltizam yang tinggi. Sebagitulah juga, perancangan resolusi memerlukan penyediaan pelan resolusi yang disesuaikan untuk setiap institusi ahli PIDM.

*Sebuah pelan resolusi merangkumi strategi resolusi pilihan, dan pelan operasi yang bertujuan untuk menyatakan bagaimana strategi resolusi pilihan tersebut akan dilaksanakan ketika resolusi.*

Sebagai sebahagian daripada proses perancangan resolusi, pemahaman yang jelas tentang institusi ahli diperlukan, dan ini mungkin diperolehi melalui penilaian menyeluruh terhadap fungsi kritikal dan ketergantungan model perniagaan institusi ahli. PIDM juga perlu memastikan bahawa strategi resolusi pilihan untuk institusi ahli boleh dilaksanakan dan berwibawa. Oleh itu, bagi memastikan keberkesanan perancangan resolusi, ia memerlukan persediaan terperinci dan penyelarasan yang rapi antara PIDM dan pelbagai pihak berkepentingan, termasuk institusi ahli itu sendiri dan pihak berkuasa kawal selia yang lain seperti Bank Negara Malaysia.

Rakyat Amerika sangat gembira menjadi negara pertama yang menghantar manusia ke Bulan, walaupun ia diselubungi kontroversi. Seperti yang dijangkakan oleh Presiden Kennedy, perjalanan itu sememangnya terlalu sukar dan mahal. Pengkritik merasakan bahawa kosnya amat tinggi; program Apollo menelan belanja kira-kira \$20 bilion dolar antara 1961 dan 1973. Walau bagaimanapun, penyokong beliau berpendapat sebaliknya; mereka bersetuju dengan Presiden Kennedy bahawa cabaran yang sukar itu mungkin akan memberikan manfaat dan kelebihan lain terutamanya dalam bidang kemajuan teknologi. Teknologi yang dibangunkan daripada program angkasa lepas kemudiannya digunakan untuk pelbagai inovasi yang merubah kehidupan harian manusia sejagat. Sebagai contoh, sut yang direka bentuk untuk angkasawan dipakai dalam keadaan suhu yang melampau juga digunakan untuk membuat sut untuk melindungi anggota bomba. Teknologi pengimejan dan satelit yang digunakan untuk penerokaan angkasa lepas digunakan dalam industri pengimbasan perubahan untuk menyelamatkan nyawa. Teknologi osmosis berbalik yang digunakan untuk mengitar semula air kumbahan di angkasa lepas juga telah membantu mengubah air kumbahan global kepada air bersih dan boleh diminum.

Sama seperti kesukaran yang timbul susulan misi ke Bulan membawa kepada pelbagai kemajuan teknologi, pelaksanaan perancangan resolusi oleh institusi ahli PIDM jika dilaksanakan dengan baik akan memberi manfaat yang besar.

“ **SEJUJURNYA, APA SAHAJA YANG KITA  
LAKUKAN, LAKUKANLAH DENGAN TERBAIK;  
DAN TIADA APA YANG BOLEH DILAKUKAN  
DENGAN BAIK TANPA TUMPUAN**

*Philip Dormer Stanhope, Earl of Chesterfield ke-4, dalam suratnya kepada anaknya tentang adab menjadi seorang lelaki budiman*

Perancangan resolusi akan membantu institusi ahli membangunkan keupayaan untuk menyokong pelaksanaan resolusi dengan segera dan teratur. Maklumat dan pandangan yang diperolehi daripada institusi ahli melalui proses perancangan resolusi juga akan membantu memudahkan PIDM membuat keputusan yang lancar dan termaklum dalam resolusi. Persediaan awal, serta keputusan pantas oleh PIDM dapat memelihara nilai institusi ahli, walaupun ketika krisis. Maklumat yang diperolehi semasa penyediaan awal juga akan meningkatkan keupayaan institusi ahli untuk menjalankan transaksi urus niaga seperti biasa, termasuk perancangan pemulihan.

Oleh sebab itu, seperti Kennedy yang memilih untuk menghantar manusia ke Bulan lebih 60 tahun yang lalu, PIDM juga telah memutuskan untuk memulakan perancangan resolusi dengan institusi ahli sebagai satu objektif strategik utamanya. Walaupun ia mungkin usaha yang rumit dan mencabar, hasilnya akan bermanfaat kerana usaha persediaan yang dilaksanakan boleh diguna pakai ketika resolusi. Seperti juga misi manusia ke Bulan yang telah memberi inspirasi kepada manusia untuk mencapai kejayaan yang lebih hebat, apa yang bermula sebagai langkah kecil dalam usaha perancangan resolusi boleh membantu kami membina sistem kewangan yang lebih kukuh dan berdaya tahan, bagi membolehkan kami melonjak jauh dalam pelbagai aspek kesediaan di masa depan.